

平  
津  
讀  
碑  
記

平津讀碑記卷三

臨海洪頤煊

北齊

風峪華嚴經刻石

天保一

右風峪華嚴經刻石在太原縣風洞顧亭林金石文字記列于北齊天保二年朱竹垞亦云有北齊天保字此拓本無之卷卅七之末有佛弟子許智通妻宋十娘許五娘口女許三娘姓名經首皆題大方廣佛花嚴經與今釋藏本不同

開府參軍崔頤墓誌銘

天保四年二月

右開府參軍崔頤墓誌銘在益都縣碑云頤清河東

武城人尙書僕射貞烈公之孫涇州使君第二子魏書崔亮傳遷左光祿大夫尙書右僕射卒諡曰貞烈亮有三子士安士和士泰士和以軍勲拜冠軍將軍中散大夫西道行臺元脩義左丞行涇州事顧卽亮之孫士和之子顧官開府叅軍年廿六武定六年七月七日卒於鄴都寢舍天保四年二月廿九日歸窆本鄉齊城南五十里之神塋新唐書宰相世系表亮在清河青州房亮曾祖輯宋泰山太守徙居青州故此碑與亮傳俱稱清河東武城人魏書地形志東清河郡治盤陽城亦屬青州

張景暉造像記

天保五年七月

右張景暉造像記在益都縣法慶寺文云平昌縣人  
張景暉爲亡父母敬造彌勒佛一軀魏書地形志平  
昌縣魏初屬平昌郡延昌中屬高密郡題名有度妻  
曹暈妻孫止著其姓與洛州鄉城老人造像碑同暈  
卽暉字

西門豹祠堂碑并陰

天保五年

右西門豹祠堂碑在安陽縣城隍廟水經濁漳水注  
漳水又東北逕西門豹祠堂前東側有碑隱起爲字  
祠堂東頭石柱勒銘曰趙建武中所脩也趙明誠金  
石錄有僞趙建武六年西門豹祠殿基記此碑又在  
其後明一統志西門豹廟在府城北大夫村北齊天

保年建碑刻尙存今碑殘泐年月不可辨矣此本視金石萃編所釋多八十餘字碑前叙西門豹治鄴事次叙齊獻武文襄時祠宇興廢末叙清河王岳立碑始末碑陰題名從事以上皆著其郡門下督以下不書錄事延陵仲口延陵是姓非郡縣名元和姓纂趙襄子謀臣有延陵正又有隊主西門万同當是其裔孫也

陳使君造像記

天保六年七月

右陳使君造像記在掖縣三里寺文云大齊天保六年歲次乙亥朔七月己卯十五日癸巳仰爲陳使君敬造越殿國像一軀後尙有題名未搨完七月己卯

朔作朔七月己卯是書碑者誤乙北齊書文宣紀是  
年秋七月己卯脫書朔字魏齊間刺史稱使君陳使  
君未詳何人

銅雀臺石叢門銘

天保九年

右銅雀臺石叢門銘在安陽縣文云大齊天保八年  
九年造銅雀臺石叢之門百代之後見此銘者當復  
知之叢从众說文众衆坡土爲牆壁叢疑卽壘字之  
俗銘後有將陳驥軍副程顯承婁晞幢主孫悅軍主  
董侯幢主楊晏隋書百官志齊制將作寺掌諸營建  
大匠一人丞四人若有營作則立將副將長史司馬  
主簿錄事等各一人又領軍主副幢主副等陳驥以

下皆是將作姓名

道肫造象記

天保十年七月

右道肫造象記文云大齊天保十季七月十五日比  
丘道肫敬造盧舍邨法界人中像一區願盡虛空邊  
法界一切衆生成等正覺黃小松司馬得之琢爲硯  
以贈武虛谷大令

夫子廟碑

乾明元年

右夫子廟碑在曲阜縣孔子廟碑殘泐僅存百四十  
餘字是乾明元年兗州刺史鄭述祖所立山左金石  
志論之詳矣北齊書鄭述祖傳述祖釋褐司空行叅  
軍天保初累遷太子少師儀同三司兗州刺史卒于

州此碑云職歷七屬重登雲峯山記天柱山銘俱云  
歷瀛趙滄冀懷及兗光行正七州刺史皆可補史之  
闕

乾明元年孔廟碑

北齊樊員外遜書後來  
雜帖採此碑乃作南齊樊退書誤也覃谿

方道顯造像記

皇建元年十月

右方道顯造像記在范縣義城寺文云唯大齊皇建  
元年歲次庚辰十月己卯朔廿六日甲辰口口清信  
士佛弟子方道顯敬造釋迦石像一區上爲皇帝陛  
下七世父母邊地衆生有形之類同其福善記左方  
字已泐下方俱爲邑子馬解秋等題名此記近始訪  
得之諸家著錄皆未載

鄉老舉孝義雋敬碑

皇建元年十二月



右鄉老舉孝義雋敬碑在泗水縣韓家澗碑云雋敬字脩羅前漢雋不疑之遺孫九世祖朗遷官於魯遂住涿源幼傾乾蔭唯母徧居捨田立寺救濟飢寒鄉赴壹百餘人刊石立樓以彰孝義又云鑽土萇安食菜勃海世但知雋不疑爲勃海人不知其得姓先自長安亦可補姓氏書之闕曠卽覲字

陽阿故縣村造像記

河清二年五月

右陽阿故縣村造像記在鳳臺縣魏書地形志陽阿縣屬高都郡二漢屬上黨郡晉罷後復屬此當是晉魏時之廢縣碑異字寅作寅嚴作嚴眷作眷錢氏未舉

比丘明空等造像記

河清三年三月

右比丘明空等造像記在益都縣李氏文云長乖四生永登一實姜纂造像記乖出六塵遨遊慧體武虛谷大令釋乖爲飛若以釋此碑則不可通矣乖卽垂字之別

張暎族等造像記并陰兩側

河清三年四月

右張暎族等造像記在登封縣此碑諸家皆題在孫寺造像記金石萃編引說嵩云碑稱在孫寺正面刻佛像碑陰刻大齊河清三年歲在甲申敬造文字剝落殆盡諦視此碑記文上截刻佛像下截并兩側碑陰俱刻像主題名唯碑陰佛像題字漫漶餘俱可讀

齊号河清三季歲次甲申四月己丑朔廿日戊申十九字在記文之末不在碑陰記中亦無在孫寺三字說嵩所言當別是一碑

鄭述祖重登雲峯山記

河清三年五月

右鄭述祖重登雲峯山記在掖縣雲峯山東述祖道昭之子道昭爲光州刺史有登雲峯山論經書詩永平四年刻于石述祖爲光州刺史重登雲峯山刻此記文云吾自幼遊此至今五十二年自永平四年下距五十二年當河清元年此記稱河清三年五月廿四日是刻此記又在其到官後二年

朱曇思等造塔記

河清四年三月

右朱曇思等造塔記在博興縣文云綿基細柳白虎  
遊南柳是柳字謂其地來脉綿遠如細柳魏志管輅  
傳白虎銜尸朱雀悲哭皆形家言豁字未詳

鄭述祖天柱山銘

天統元年五月

右鄭述祖天柱山銘在平度州天柱山碑末題天統  
元年歲次乙酉五月壬午朔十八日巳亥刊是述祖  
爲光州刺史之四年也碑云凡諸身歷瀛趙滄冀懷  
及兗光七州刺史北豫州大中正三登常伯再履納  
言光祿大常頻居其任重登雲峯山記亦云歷司徒  
長史再履尙書三爲侍中滄瀛冀趙懷兗行正得此  
七州刺史列銜北齊書本傳多失載七州諸家作十

州誤

姜纂造像記

天統元年九月

右姜纂造像記在偃師縣董家村前題大齊天統元年乙酉九月庚辰朔八日丁亥界官姜纂爲亡息元略敬造石像壹軀界官猶言邑子記文三百三十七字別體字仰作仰遍作遍衆作衆武氏未舉

紀僧諮造像記

天統三年正月

右紀僧諮造像記在益都縣鄉賢祠碑題大齊天統三年歲次丁亥正月癸酉朔十二日甲申北齊書後主紀天統三年二月壬寅朔是正月小也碑區作軀含作哈靈作需皆異文

韓永義等造七佛寶堪記 天統三年三月

右韓永義等造七佛寶堪記在偃師縣年月後有邑主韓永義等題名有官爵者四皇甫士通結銜稱洛州都兼治中奉朝請西門豹祠堂碑陰有州都高口州都元韶口隋書百官志齊制司州置牧屬官有州都洛州本西魏司州齊改爲洛州此有州都者亦舊稱也

朱道威等造丈八大像訟 天統三年五月

右朱道威等造丈八大像訟在許州關帝廟訟卽頌字文云大齊天統三年歲在丁亥三字微有泐痕或釋作五年者誤也文可辨者二百二十六字碑陰金

石萃編拓本亦未完

隴東王感孝頌 武平元年正月

右隴東王感孝頌在肥城縣孝堂山隴東王者胡長仁也北齊書本傳長仁武成皇后之兄累遷右僕射及尙書令世祖崩預參朝政封隴東王和士開嫉之出爲齊州刺史長仁忽憤謀刺士開事覺賜死以此碑證之知長仁之爲齊州刺史在武平元年正月北史本傳載天統五年從駕白并還鄴因及士開之譖及長仁到任謀刺士開士開與祖孝徵議遣使馳驛責長仁賜死事通鑑遂以長仁刺齊州及賜死俱繫之天統五年四月錢辛楣少詹攷隋書五行志武平

四年四月隴東王胡長仁謀遣刺客殺和士開事露反爲士開所諧死則長仁之死又在其後四年以駁通鑑之誤其實皆非也北齊書後主紀武平二年秋七月庚午太尉琅邪王儼矯詔殺錄尚書事和士開於南臺則長仁之死豈得至武平四年長仁從駕自并還鄴在天統五年其爲和士開所諧及爲齊州刺史到任謀遣刺士開事覺賜死在武平元年四月隋書五行志武平四年當是元年傳寫之譌碑本云武平元年正月少詹釋作四月亦誤

董洪達造像記

武平元年正月

右董洪達造像記在登封縣少林寺碑題大齊武平



元年歲次庚寅正月乙酉朔廿六日北齊書後主紀  
是年亦書正月乙酉朔題名有忠正董始隆忠正董  
祖鸞隋書百官志有州中正郡中正縣中正在孫寺  
造像記有都邑忠正此單稱忠正又當在其下

朱岱林墓志

武平二年二月

右朱岱林墓志在壽光縣田劉村岱林字君山樂陵  
濕沃人碑云魏廣陵王俾侯南服妙選英佐徵爲國  
常侍彭城王又以皇枝之貴作牧東秦召爲主簿魏  
書廣陵王羽傳高祖時羽除使持節都督青齊光南  
青四州諸軍事征東大將軍開府青州刺史彭城王  
勰傳邵襲封世宗時除使持節假散騎常侍平東將

軍青州刺史然則碑所云廣陵王卽羽彭城王卽邵也岱林以齊泰之年爲三齊羣盜所殺前廢帝紀齊泰元年七月鎮遠將軍清河崔祖螭聚青州七郡之衆十餘萬人圍東陽東陽青州治岱林之卒當卽在此時以武平二年二月六日葬距其卒時已三十年矣

僧道畧等造神碑尊像記

武平二年五月

右僧道畧等造神碑尊像記在偃師縣文云邑師比丘僧道畧共邑義三百餘人敬造神碑一所尊像八堪記凡五百九十二字徑作徑蹤作縱昏作惛長作萇烈作烈皆異文

皇太后造觀音石像記

武平二年十一月

右皇太后造觀音石像記在臨漳縣三臺佛寺文云  
皇太后以武平二年十一月十三日敬造觀世音石  
像一區以此勝善仰資武成皇帝昇七寶之宮殿皇  
帝處萬國之威雄皇太后者武成胡皇后也北齊書  
帝紀天統四年十二月辛未太上皇帝崩于鄴宮謚  
曰武成皇帝戊寅上太上皇后尊號爲皇太后此記  
距武成薨已二年矣胡太后安定胡延女齊亡八周  
隋開皇中殂

伏波將軍石永興等造像記

武平二年十一月

右伏波將軍石永興等造像記在登封縣字皆刻于

佛像四旁左一行云當陽像主伏波將軍儀州司馬  
廣武郡西面都督南潁川郡城局叅軍石永興魏書  
地形志廣武郡屬北豫州天平初分滎陽置南潁川  
郡不言治所隋書百官志齊制上上州刺史置府屬  
官有城局叅軍

馮翊王平等寺碑

武平二年

右馮翊王平等寺碑在偃師縣義井舖北洛陽伽藍  
記平等寺廣平武穆捨宅所立在青陽門外二里御  
道北所謂孝敬里也寺門外金像一軀高二丈八尺  
相好端嚴常有神驗碑稱永平中造定光銅像一區  
高二丈八尺永熙季金塗訖功像在寺外遷鄴後城

寺口毀齊高祖觀兵故洛遷像入寺登給羽林長口  
守口武定末世宗廣施軍資增給兵力至河陽道大  
行臺馮翊王高潤脩復此寺皆可補伽藍記所不及  
高潤神武第十四子北齊書本傳稱河南道行臺此  
碑作河陽道碑云匠人單五郡之妙當卽其所屬郡  
也碑宏作客拯作拯塵作麤鞠作菊轂作輦皆異文  
邑義主一百人等造靈塔記

武平三年十二月

右邑義主一百人等造靈塔記在滋陽縣湯氏梵語  
塔爲雀離洛陽伽藍記乾陀羅城東南七里有雀離  
浮圖此記類越於雀離朱曇思造像記霄璃昔住音  
義並同

趙桃口夢造像記

武平三年十二月

右趙桃口夢造像記在洛陽縣說文婁古文妻从肖  
女肖古文貴字司馬景和妻墓誌銘作妻此作夢皆  
婁字之別結銜稱戎昭將軍伊陽城騎兵叅軍魏書  
地形志伊陽郡屬北荊州此稱伊陽城者其時郡已  
廢也騎兵叅軍亦府屬官

臨淮王南陽寺碑并陰

武平四年六月

右臨淮王南陽寺碑在益都縣城北文昌祠碑文一  
千六百餘字碑上段已斷作數塊以鐵束之臨淮王  
者婁定遠也北齊書附見其父昭傳稱定遠少歷顯  
職外戚中偏爲武成愛狎別封臨淮郡王武成大漸

與趙郡王等同受顧命位司空尋除瀛州刺史此碑  
云使持節都督青州諸軍事驃騎大將軍青州刺史  
司空公寧都縣開國公高城縣開國公昌國侯臨淮  
王其勲階食封本傳多闕載和士開傳稱定遠與趙  
郡王叡謀出土開爲兖州刺史未行士開納賄定遠  
得留復出定遠爲青州刺史責叡以不臣之罪而殺  
之後主紀天統五年二月殺太尉趙郡王叡三月以  
婁定遠爲司空則定遠之出爲青州刺史當在天統  
五年二月以前三月卽召還爲司空碑首題大齊武  
平四年歲次癸巳六月乙未朔廿七日辛酉建是立  
碑年月非定遠在官之年月也碑陰有龍興之寺四

大字相傳爲唐李邕書

等慈寺造像記

武平五年十月

右等慈寺造像記在汜水縣碑止存上截十八行行  
十二字首行有大齊武平五年歲次甲午十月字第  
四行合上空十一字當是合邑人姓名尙未刻也碑  
武作武容作裕酸作酸龕作龕圖作圖囊作囊衡作  
衡皆異文

都邑師道興造像記并治疾方

武平六年六月

右都邑師道興造像記并治疾方在洛陽縣伊闕金  
石萃編謂耀州石刻孫真人千金方存字闕文與此  
悉同顧煊嘗取明隆慶六年耀州所刻千金寶要石



本并孫真人千金方刻本校之與此方無一同者不知少寇何以有此語唯療霍亂用蠅方療心痛用生油方療上氣咳嗽用桑白皮吳茱萸方療卒狂言鬼語用甌帶方葛洪肘後方有之此所刻疑卽葛氏本也

孟阿妃造像記

武平七年二月

右孟阿妃造像記在偃師縣老君洞碑首稱大齊武平七年歲次丁酉二月甲辰朔廿三日丙寅武平七年是丙申非丁酉金石萃編疑其誤顧煊攷北齊書本紀武平七年十二月丁巳改武平七年爲隆化元年戊午安德王延宗從衆議卽皇帝位改隆化爲德

昌元年辛酉延宗爲周師所虜甲子後主議禪位皇太子隆化二年正月乙亥幼主卽皇帝位改元爲承光元年癸未幼主東走己丑周師至紫陌橋癸巳燒城西門巳亥渡河入濟州其日幼主禪位於任城王潛爲周師所虜而齊遂亡自十二月丁巳至二月丙寅相距止七十日凡四易主四改元逃竄匆遽之際號令未必及於民間且齊正月己亡其時民心未定故歲次丁酉仍以武平七年繫之非誤也馬天祥等造像記稱武平九年二月廿八日亦同此意

智超等造像記

右智超等造像記不知所在金石萃編附于魏末諦

視年上尙有齊字可辨故改附于此丁卯下空三字  
丙戌空者當是朔廿日

吳洛族造像記

石吳洛族造像記在偃師縣壽聖寺據偃師金石遺  
文記此碑正面佛像旁皆有字此僅得其碑陰所刻  
北周

程惠等造七級浮圖記

武成二年四月

右程惠等造七級浮圖記在長安縣圓通寺文云維  
周武成二年四月八日口口太原四部邑子口口他  
人等仰爲先帝造七級浮圖下層爲都口主優婆塞  
皇甫景元等題名周書明帝紀武成二年四月辛丑

崩是年正月癸丑朔辛丑在四月八日後所稱先帝當是孝閔帝諸家釋作武成三年者誤也

王龔生造象記

保定四年

右王龔生造象記在長安縣淵如觀察移歸五松園文云合門大小年一己上百歲已來後列祖父王憲祖母張香香父王魯是母三人龔生息男三人女二人計其祖父母當及百歲故云然魏書高肇傳有伊龔生訪碑錄魏造像有高龔生黑龔生

少保豆盧恩碑

天和元年

右少保豆盧恩碑在咸陽縣恩字永恩昌黎徒何人周書附其兄豆盧寧傳以字行碑自授利州刺史以

下俱殘缺其餘官階俱與本傳同唯傳云父長武成  
初追贈柱國大將軍少保涪陵郡公碑作保定二年  
詔贈不云少保傳云大統八年除直寢右親信都督  
尋轉都督碑作尋轉大都督傳云魏廢帝二年出爲  
成州刺史碑作三年又云尋加侍中知史誤也傳云  
高祖勝以燕皇始初歸魏授長樂郡守賜姓豆盧氏  
或云避難改焉碑云自天市星妖連津兵覆尙書府  
君改姓豆盧氏傳云屢逢征討皆有功拜龍驤將軍  
中散大夫碑云大統三年有沙蕞之戰四年有河橋  
之役授龍襄將軍中散大夫又保定元年秋將兵破  
巴州獠傳亦不載此皆可補史之闕碑本庾信所撰

見文苑英華刊本多譌字當以此碑正之

華嶽頌

天和二年十月

右華嶽頌在華陰縣西嶽廟碑云前代曾創祠宇兼植栢樹歷年茲多懷棟崩褫樹亦殘缺太祖文皇帝以大統十年謁諸天子命車騎大將軍儀同三司西兗州大中正舉山郡太守城陽縣開國公恒農楊子昕經始締構別更列植青松二千餘根太祖文皇帝者宇文泰也時爲華州刺史周書文帝紀大統十年夏五月太祖入朝卽碑所謂謁諸天子也楊子昕周書無傳魏書地形志華山郡屬華州西兗州孝昌三年置碑叙太師太冢宰晉國公宇文護太師與太祖

平津讀碑記卷三  
皇帝等字俱空一格與敬使君碑同

宇文達造像記

天和五年六月

右宇文達造像記在咸寧縣前列宇文康結銜下云  
天和五年歲次庚口六月癸未朔十七日己亥宇文  
達爲七世所生見在父母合家大小造口口像一軀  
達似卽康子文云見在父母後列母張女畢而不及  
父以見于前也

嚴迴達造像記

天和五年十月

右嚴迴達造像記在長安縣文云于時歲黠提格口  
口林鍾月令初旬匠功告訖歸卽攝字林鍾爲六月  
下文又云天和五年十月廿六日造作功訖其造像

非一時事

費氏造像記

天和六年五月

右費氏造像記在長安縣後題邑主陽烈將軍費伯達陽烈卽揚烈魏書官氏志揚烈將軍從第四品周初據關內官名未改魏號其階當與之同碑微作薇夷作茂願作顛胥作滑馮作旭皆異文

隋

淮安定公趙芬碑

開皇五年

右淮安定公趙芬碑在長安縣中兆村碑僅存二殘石芬字士茂天水西人隋書有傳所載官階與碑少異傳云周太祖引爲相府鎧曹叅軍歷記室碑作口



書舍人尙書兵部郎傳云加開府儀同三司碑作儀同三司仍長史傳云申國公李穆之討齊也引爲行軍長史封淮安縣男碑作治夏官府司馬封淮安縣開國子傳云進爵郡公以老病乞骸骨歸于家碑作聽以大將軍淮安公歸第又稱淮安定公皆可補史之闕碑開皇五年除口州刺史以傳校之泐者當是蒲字

兗州高平縣石裏村仲思那等造槁碑

開皇六年二月

右兗州高平縣石裏村仲思那等造槁碑在鄒縣石裏村隋書地理志任城縣注云舊置高平郡隋開皇初廢徐城縣注云梁置高平郡東魏又併梁東平陽

平清河歸義四郡爲高平縣任城縣屬魯郡舊兗州  
徐城縣屬下邳郡後周改爲泗州據此碑開皇初高  
平縣屬兗州不屬泗州碑異字衢作衢厭作厭焚作  
樊樂作樂看作看虛作虛蔚作尉來作來繼作繼彥  
作充錢氏未舉

王忻造像記

開皇六年七月

右王忻造像記在長安縣年月下稱前上士州從事  
國子助教開國男洞玄弟子王忻敬造上士爲周官  
故稱前以別之隋書百官志周制王朝之臣上士三  
命公之上士再命侯伯之上士一命忻不知所爲何  
官忻奉道教故稱洞玄弟子銘云奉資王矣王字空

一格亦不知何人

車騎秘書郎張景畧墓銘

開皇十一年正月

右車騎秘書郎張景畧墓銘在安陽縣景畧燕州上谷人弱齡徵辟起家爲魏帝內侍左右遷秘書郎加車騎大將軍開皇十一年正月六日卒春秋六十有八祖驃騎大將軍第一領民酋長文城公又遷燕州諸軍事燕州刺史景畧似其祖爲燕州刺史遂爲燕州人魏書地形志太和中分恒州東部置燕州孝昌中陷隋書地理志無燕州碑云燕州上谷人似尙沿舊稱考濟安郡太守金鄉侯魏齊間無濟安郡不知何時所授

□照禮造像記

開皇十一年正月

右□照禮造像記在萊陽縣初頤園中丞家文云開  
皇十一年歲次辛亥正月甲申朔十五日戊戌首民  
□照禮爲□□亡七世父母所生父母祖□起婁夏  
侯父□頤母果僧妃升阿□婁夏侯記刻于佛坐首  
民疑卽民望之類

建安公構尼寺銘

開皇十一年六月

右建安公構尼寺銘不知所在文云我大隋膺千齡  
之會處五運□□皇帝乃詔州縣各立僧尼二寺使  
君建安公仰依明勅乃於形勝之所崇構尼寺隋書  
高祖紀不載此詔唯釋法琳辨正論奉佛篇載隋高

祖文皇帝開皇三年詔曰朕欽崇聖教念存神宇其  
周朝所廢之寺咸可脩復京兆太守蘇威奉勅於京  
城之內選形勝之地安置伽藍於是合京城內無論  
寬狹有僧行處皆許立寺所述頗與此碑相同

陳思王曹植廟碑

開皇十三年

右陳思王曹植廟碑在東阿縣陳思王墓旁魏志陳  
思王植傳初植登魚山臨東阿喟然有終焉之志遂  
營爲墓碑述墓在魚山傍羊茂臺至十一世孫曹永  
洛去齊朝皇建二年孝昭皇帝崇奉三恪永洛等興  
復靈廟饋嗣蒸嘗四時受謁隋開皇十三年立此碑  
碑叙植封爵年月謫脫錢辛楣少詹論之詳矣唯稱

傳建安十九年太祖征孫權使植留守鄴戒之曰我昔爲頓丘令年二十三思此時所行無悔于今汝年亦二十三矣通鑑考異引此文云植今年年二十三則死時當年四十一矣本傳云三十一誤也今諦視此碑薨時年卅有壹卅字下半已泐上半左直畫稍偏微存卅形足證隋以前本尙未誤

張洪亮等造像記

開皇十五年四月

右張洪亮等造像記在益都縣廣福寺文云大隋開皇十五年歲次乙卯四月己丑朔八日丙申維那張洪亮等敬造美光像一軀隋書高祖紀是年四月己丑朔大赦天下美卽勝字

比丘尼脩梵石室誌銘

開皇十五年十月

右比丘尼脩梵石室誌銘在益都縣李氏脩梵俗姓張氏清河東武城人瀛州刺史烈之第三女同縣崔居士南青使君之第五子以德義故歸焉未獲偕老而君子先逝遂出家入道開皇十三年八月廿三日終于俗宅春秋九十有一張烈魏書有傳山左金石志攷南青使君爲崔僧淵第五子名祖螭頤煊以魏書崔僧淵傳證之傳云僧淵入國坐兄弟徙于薄骨律鎮太和初得還又云僧淵元妻房氏生二子伯驎伯驥後薄房氏更納平原杜氏僧淵之徙也與杜俱去生四子伯鳳祖龍祖螭祖虬得還之後棄絕房氏

遂與杜氏及四子家于青州是太和初年祖螭已生  
祖螭與張僧皓同反其死在普泰初計其年已五十  
餘矣脩梵開皇十三年卒年九十一普泰初止廿九  
歲年齒旣不相若祖螭傳刺史元羅板爲兼統軍魏  
書後廢帝紀又稱鎮遠將軍清河崔祖螭俱與碑稱  
崔居士不合所謂南青使君或別有其人疑未敢定  
也

梁州使君陳茂碑

開皇十八年十一月

右梁州使君陳茂碑不知所在茂隋書有傳以此碑  
校之傳所載官階多闕碑中段已全泐上下亦剝落  
僅存無幾集古錄載此碑茂字延茂又爲行軍元帥



長孫覽司馬又爲蜀王府長史梁州刺史金石錄載此碑在開皇十八年十一月當是其薨之年今皆泐不可考矣

青州舍利塔下銘

仁壽元年十月

右青州舍利塔下銘在益都縣廣福寺隋書高祖紀仁壽元年六月乙丑頒舍利於諸州王邵舍利感應記皇帝皇后於京師法界尼寺造連基浮圖開皇十五年季秋之夜有神光自基而上右繞露盤赫若冶鑪之燄一旬內四如之皇帝以仁壽元年六月十三日御仁壽宮將於海內諸州選三十處各起舍利塔於是親以七寶箱奉三十舍利自內而出以琉璃盛

金瓶置舍利於其內薰陸香爲泥塗其蓋而印之三  
十州同刻十月十五日正午入於銅函石函一時起  
塔此銘云維大隋仁壽元年歲辛酉十月辛亥朔十  
五日乙丑皇帝普爲一切法界幽顯生靈謹於青州  
逢山縣勝福寺奉安舍利敬造靈塔卽其奉勅之日  
也

鄧州舍利塔下銘

仁壽二年四月

右鄧州舍利塔下銘在河南布政司庫銘云以仁壽  
二年四月戊申朔八日乙卯謹於鄧州大興國寺奉  
安舍利崇建神塔王邵舍利感應記仁壽二年正月  
二十三日復出舍利分布五十一州建立靈塔期用

四月八日午時合國化內同下舍利封入石函鄧州  
蓋其一辨正論隋高祖以後魏大統七年六月癸丑  
生於同州般若尼寺開皇四年以般若故基造大興  
國寺又許僧始龍潛之日所經行處四十五州皆造  
大興國寺此鄧州所以有大興國寺也

李世民造像記

大業元年十一月

右李世民造像記在滎陽縣南寺文云鄭州刺史男  
李世民遇染時患比聞大海寺有雙王像治病有驗  
故就寺禮拜其患乃除口於此寺願造石彌勒像一  
鋪新唐書高祖紀大業初爲滎陽太守卽鄭州刺史  
太宗時年八歲鄭州刺史下不著姓名他碑所未有

寶刻叢編鄭州有張仲方大海寺王像碑

陳叔毅脩孔子廟碑

大業七年七月

右陳叔毅脩孔子廟碑在曲阜縣孔子廟魯相韓勅造孔廟禮器碑稱韓明府名勅北海相景君銘稱伏惟明府受質自天漢唯太守稱府君亦稱明府此碑叔毅除曲阜縣令亦稱陳明府異乎前之稱矣末書濟州秀才前汝南郡主簿仲孝俊作文新唐書杜正倫傳隋重舉秀才天下不十人而正倫一門三秀才孝俊亦當在十人之列

左屯衛大將軍姚辯墓誌銘

大業七年十月

右左屯衛大將軍姚辯墓誌銘原石久亡此是後人

重刊本字多刪落往往不能句讀辯字思辯武威人  
隋書無傳然紀傳中頗見其人帝紀開皇十六年五  
月丁巳以蔡陽縣公姚辯爲靈州總管仁壽三年二  
月戊子以大將軍蔡陽郡公姚辯爲左武侯大將軍  
大業三年三月壬子以大將軍姚辯爲左屯衛將軍  
七年三月丁亥右光祿大夫左屯衛大將軍姚辯卒  
碑作大業二年授左武侯大將軍進爵蔡陽郡開國  
公食邑一千五百戶四年授右光祿大夫左屯衛大  
將軍餘俱與史同突厥傳開皇十九年遣大將軍姚  
辯出河州以擊都藍師未出塞而都藍爲其麾下所  
殺碑是年授環州道行軍總管擊都藍師未出塞故

不書金石萃編僅引煬帝紀大業七年卒一條謂前此竟無一語及者此偶失檢之過

李靖上西嶽文

右李靖上西嶽文在藤縣碑額題唐相衛國李公上西嶽真蹟末題紹興丙寅秋七月右朝請郎知軍州事施□重立此文宋崇寧三年刻于潞州明成化壬辰又刻于西嶽廟中與此刻而三

青州默曹殘碑

右青州默曹殘碑在益都縣隋書百官志齊制三公府有墨曹行參軍上上州刺史置府屬官有墨曹行參軍此碑云青州默曹青州爲上上州也

平津讀碑記卷三

終

平津讀碑記卷四

臨海洪頤煊

唐

秦王告少林寺主教

武德四年四月

右秦王告少林寺主教在登封縣少林寺一刻在裴  
灌嵩嶽少林寺碑之上刻在少林寺柏谷塢莊碑  
之前末題四月卅日願亭林以碑首結銜證之知是  
武德四年新唐書高祖本紀武德四年四月壬寅齊  
王元吉及王世充戰于東都敗績行軍總管盧君諤  
死之此告當在元吉敗後竇建德未擒之前

觀音寺碣

武德五年



右觀音寺碣在汜水縣王留村文云王世充竇建德  
爲讐大邦我秦王赫然斯怒罪人乃得班師凱還駐  
蹕廣武舊唐書高祖本紀武德四年五月己未秦王  
大破竇建德之衆於武牢擒建德河北悉平丙寅王  
世充奉東都降河南平秋七月甲子凱旋獻俘于太  
廟太宗本紀作六月凱旋蓋獻俘在七月其凱旋駐  
蹕廣武則當在六月也

孔子廟堂碑

武德九年十二月

右孔子廟堂碑在西安府學宮碑已裂爲三段又多  
剝落不能全讀碑後王彥超結銜稱兼中書令則其  
刻已在宋初此碑唐刻本有大周孔子廟堂之碑題

額末有長安三年太歲癸卯金四月壬辰水朔八日  
己亥木書并鍾紹京等題字彥超再建本皆無之唯  
碑前尙存相王旦銜名

又

右孔子廟堂碑在城武縣碑前亦有相王旦銜名碑  
後無刊碑年月翁覃谿閣學以爲亦宋時所刻碑尙  
完好唯下方稍殘泐夫子膺□□之精大唐運膺九  
五皇帝欽明睿哲皇上以幾覽餘暇西安本夫子大  
唐皇帝字空一格此本皆跳行書

左光祿大夫皇甫誕碑

右左光祿大夫皇甫誕碑在西安府學宮誕隋書有

傳以仁壽四年九月死漢王諒之難碑稱子民部尚書上柱國滑國公無逸又于志寧結銜稱太子左庶子以兩唐書攷之碑當立于貞觀初年誕贈弘義郡公隋書地理志無此郡

鄭州等慈寺碑

金石錄貞觀三年

右鄭州等慈寺碑在汜水縣等慈寺碑不題年月舊唐書本紀貞觀三年十二月癸丑詔建義已來交兵之處爲義士勇夫殞身戎陣者各立一寺命虞世南李伯藥褚亮顏師古岑文本許敬宗朱子奢等爲之碑銘以紀功業元和郡縣志等慈寺在汜水縣東七里王師旣破竇建德有詔于戰所起寺立碑紀功焉

令顏師古爲其碑文唐會要亦云破寶建德于汜水  
立等慈寺秘書監顏師古爲碑銘並貞觀四年五月  
建造畢碑末結銜稱通議大夫行秘書少監輕車都  
尉琅邪縣開國子舊唐書師古傳太宗踐阼擢拜中  
書侍郎封琅邪縣男貞觀七年拜秘書少監十一年  
進爵爲子以碑結銜證之知史誤也

幽州昭仁寺碑

貞觀四年十月

右幽州昭仁寺碑在長武縣碑與鄭州等慈寺碑同  
時勅建元和郡縣志昭仁寺在宜祿縣西十步淺水  
原上王師討平薛仁果詔于此置寺碑諫議大夫朱  
子奢之詞也卽此舊唐書高祖本紀武德元年六月

薛舉寇涇州八月壬午薛舉死其子仁果復稱帝命秦王爲元帥以討之十一月己酉秦王大破薛仁果於淺水原降之隴右平碑云于時攝提在歲黃鍾紀月又云仍於戰地爰構神居碑所言皆與史合

臨淄定公房彥謙碑

貞觀五年三月

右臨淄定公房彥謙碑在章邱縣趙山彥謙隋書有傳唐宰相玄齡父也碑云七世祖謙隨慕容氏南度寓於齊土宋元嘉中以齊郡之西部置東冀州東清河郡繹幕縣仍爲此郡縣人至於簡侯又於東廣川郡別立武強縣令子孫居之魏書地形志齊州治歷城劉義隆置冀州所領有清河郡廣川郡碑稱東冀

州東廣川郡者皆後人追加以別於信都之冀州  
廣川郡也碑稱彥謙遷都州司馬尋以州廢解任傳  
作彥謙知王綱不振遂去官隱居不仕傳不及碑之  
核矣

九成宮醴泉銘

貞觀六年四月

右九成宮醴泉銘在麟遊縣碑後題兼太子率更令  
勃海男臣歐陽詢奉勅書舊唐書歐陽詢傳貞觀初  
官至太子率更令弘文館學士封勃海縣男碑不書  
弘文館學士者職官志弘文館學士無員數自武德  
已來皆妙選賢良爲學士故事五品已上稱學士六  
品已上稱直學士不在階中故唐初結銜皆不書虞

世南傳太宗昇春宮遷太子中舍人及卽位轉著作郎兼弘文館學士孔子廟堂碑結銜稱太子中舍人行著作郎不稱弘文館學士朱子奢傳累遷諫議大夫弘文館學士幽州昭仁寺碑結銜稱守諫議大夫騎都尉不稱弘文館學士皆其證

尚書右僕射虞恭公溫彥博碑

貞觀十一年十月

右尚書右僕射虞恭公溫彥博碑在醴泉縣昭陵彥博舊唐書附其兄大雅傳碑雖殘泐其稱通事舍人徵爲中書舍人以公爲行軍司馬拜太子右庶子進爵曰虞國公口口於昭陵之側皆與傳合傳云尋檢校吏部侍郎碑作檢校吏部郎中尋口爲口口侍郎

泐者當是吏部字傳不言郎中者省文也碑口政出

奔高麗

尋口爲口口侍郎此二字愚以舊拓全本審視非吏部也乃是中書侍郎又口政出奔高

麗政上是解斯二字單谿

旣而乘轅南反詔公銜命蕃境申明臣

節陳之以逆順口之以禍福又以公爲東北道招慰

大使傳不載其事唯云隋亂幽州總管羅藝引爲司

馬及歸國後高麗遣使貢方物高祖欲令不稱臣彥

博不可碑亦不載此事疑史誤也新唐書宰相世系

表溫裕後魏太中大夫生君攸君攸除泗州司馬碑

祖裕魏太中大夫考君悠三字尙可辨

益州司馬裴鏡民碑

貞觀十一年十月

右益州司馬裴鏡民碑在聞喜縣鏡民以開皇十六



年三月討西南夷死難隋書無傳唯高構傳云弘農  
劉士龍清河房山基爲考功河東裴鏡民爲兵部並  
稱明幹碑稱開皇受禪其日除尙書左外兵郎尋改  
爲兵部侍郎又云行臺民部尙書陳茂情恃惟舊志  
多慢下雖處斷乖方無敢違異君閭閻抗直未嘗順  
旨隋書陳茂傳不載茂爲民部尙書亦史之闕

睦州刺史張琮碑

貞觀十三年二月

右睦州刺史張琮碑在咸陽縣雙照村琮字文瑾武  
威姑臧人釋褐隨奮武尉煬帝征遼有功授朝散大  
夫尋除新鄭令遷潁川郡丞歸唐後除驃騎將軍尋  
改授左衛中郎將從討劉武周授左三總管還除左

衛長史以討王世充劉黑闥功授上柱國封南安縣  
開國侯食邑七百戶貞觀元年授太子左衛率四年  
授雲麾將軍十年授銀青光祿大夫行睦州刺史十  
一年薨諡曰懿新舊兩唐書俱不爲立傳何也碑又  
稱其曾祖誼魏驃騎將軍涼州刺史黃門侍郎散騎  
常侍武威郡公祖暉周驃騎將軍鄜城郡太守死王  
事贈上柱國瀛州總管河北庄公父辯隨上柱國使  
持節秦州諸軍軍事秦州總管潭州總管左武衛大將  
軍河北郡開國公祖母李景皇帝之女贈信都郡大  
長公主母竇隨文帝之甥夫人長孫文德皇后之姊  
俱不見于史

左屯衛將軍姜行本紀功碑

貞觀十四年閏六月

右左屯衛將軍姜行本紀功碑在哈密城北天山麓  
碑紀侯君集等討高昌麴文泰師行經此勒石紀功  
碑稱侯君集爲交河道行軍大總管薛萬均姜行本  
爲副總管碑額單題大唐左屯衛將軍姜行本勒石  
口口文舊唐書姜行本傳高昌之役以行本爲行軍  
副總管率衆先出伊州未至柳谷百餘里依山造攻  
具其處有班超紀功碑行本磨去其文更刻頌陳國  
威德而去遂與侯君集進平高昌其時行本先出伊  
州以貞觀十四年五月十日師次伊吾時羅漫山碑  
立于六月廿五日攻具造成故碑云未盈旬月刻成

奇功也交河道行軍總管薩孤吳仁牛進達領軍後到過此故復題名于碑側元和郡縣志天山一名時羅漫山在伊州北一百二十里

伊闕佛龕碑

貞觀十五年十一月

右伊闕佛龕碑在洛陽縣伊闕集古錄作三龕記貞觀十五年魏王泰爲長孫皇后造兼中書侍郎岑文本撰起居郎褚遂良書今舊拓本碑末尙有十五年歲次辛丑十一月字可辨時長孫皇后薨已五年矣

楊州都督褒國公段志玄碑

貞觀十六年

右楊州都督褒國公段志玄碑在醴泉縣昭陵碑下截已殘泐碑所載官階與兩唐書本傳少有異同碑

云上又追懷功烈詔司存圖形於戢武閣金石錄謂唐史及諸書功臣圖形皆云凌烟閣河間元王與此碑皆云圖形戢武意凌煙先名戢武後改之耳攷舊唐書太宗本紀貞觀十七年正月戊申詔圖畫司徒趙國公無忌等勲臣二十四人於凌煙閣河間元王孝恭以貞觀十四年薨志玄以貞觀十六年薨其時本圖形在戢武閣迨十七年改畫凌煙而戢武之制遂廢玉海引實錄太宗與公卿謁太上皇於戢武殿置酒爲歡乙夜方散明日復置酒於凌煙閣戢武閣其卽戢武殿歟

晉祠銘

貞觀二十年正月

右晉祠銘在太原府西南四十里元和郡縣志晉祠一名王祠周唐叔虞祠也晉祠銘在乾陽門街貞觀二十年太宗幸并州所置御製并書冊府元龜亦云太宗貞觀二十年正月幸晉祠樹碑製文親書之于石今碑有太宗飛白書貞觀廿年正月廿六日九字題額舊唐書太宗本紀貞觀十九年十二月戊申幸并州二十年正月上在并州三月己巳車駕至京師碑正其在并州時所作金石萃編以碑首題貞觀二十一年七月蓋未見此額沿朱竹垞題跋之誤

洛州思順坊老幼等造像記

貞觀二十二年四月

右洛州思順坊老幼等造像記在洛陽縣伊闕文云

遂於茲嶺敬造彌勒像龕一所地聳雙闕壁映千尋  
前泝清流却依重岫水經伊水注昔大禹疏以通水  
兩山相對望之若闕伊水歷其間北流故謂之伊闕  
東巖西嶺並鐫石開軒此碑又當在伊闕之西矣碑  
字斲作斲侯作侯彼作彼鑿作鑿微作微豁作豁徒  
作徒尙沿六朝之舊

太尉梁文昭公房玄齡碑

右太尉梁文昭公房玄齡碑在醴泉縣昭陵碑殘泐  
所存字無幾金石錄云其後題修國史河南公而名  
姓殘闕今此六字亦不可見矣舊唐書本傳房喬字  
玄齡新唐書房玄齡字喬碑與新唐書同新唐書擢

子遺愛爲右衛中郎將遺則朝散大夫碑亦云遺則爲朝散大夫舊唐書作中散大夫誤也兩唐書又云子遺直嗣次遺愛尙高陽公主是玄齡長子遺直次遺愛次遺則碑亦云第三子遺則宰相世系表作長遺直次遺則次遺愛兩唐書不誤又表誤也

洛陽鄉望王師德等造像記

永徽元年

右洛陽鄉望王師德等造像記在洛陽縣龍門文云今有洛陽鄉望父老等卅人碑前列像主王師德等止廿四人鄉望疑卽民望之類碑演作演斲作斲檀作檀從容作從蓉皆異文

三藏聖教序并記

永徽四年十月



右三藏聖教序并記在長安縣慈恩寺序太宗製記  
高宗製皆褚遂良書刻于永徽四年序題十月十五  
日結銜稱中書令記題十二月十日結銜稱尙書右  
僕射上柱國河南郡開國公舊唐書高宗本紀永徽  
四年九月甲戌吏部尙書河南郡公褚遂良爲尙書  
右僕射依舊知政事史不書爲中書令者或暫帶也

萬年宮銘并陰

永徽五年五月

右萬年宮銘在麟遊縣舊唐書高宗本紀永徽二年  
九月癸巳改九成宮爲萬年宮五年三月戊午幸萬  
年宮唐會要上謂太尉無忌曰此宮非直涼冷且去  
京不遠朕離此十年屋宇無多損壞昨者不易一椽

一瓦便已可安乃親製萬年宮銘并序七百餘字羣臣請刻石于永光門詔從之是此宮新脩成高宗初幸因有此銘碑陰題奉勅中書門下及見從三品以上并學士並聽自書官名于碑陰學士不及三品故特言之薛仁貴傳永徽五年高宗幸萬年宮甲夜山水猥至仁貴登門枕叫呼以警宮內碑陰有左領軍將軍臣口仁口金石萃編謂卽薛仁貴諦視仁上字有金旁可辨非仁貴明矣仁貴時爲右領軍郎將正五品例不得書

化度寺海禪師方墳記

顯慶二年四月

右化度寺海禪師方墳記在長安縣長安志化度寺

本真寂寺隋尙書左僕射高頴宅開皇三年頴捨宅  
奏立爲寺武德二年改化度寺在義寧坊南門之東

心經并瘞琴銘

顯慶二年八月

右心經并瘞琴銘不知所在心經後題顯慶二年八  
月一日莊寧爲夫資福書瘞琴銘不署年月題顧升  
撰書是其妻亡後所作

三藏聖教序并記

顯慶二年十二月

右三藏聖教序并記在偃師縣學宮序記俱同褚本  
前題門下錄事王行滿書褚本細之則攝於豪釐此  
本豪作毫雲露方得泣其花此本花作華則濁類不  
能霑此本霑作沾

禮部尙書張胤碑 顯慶三年正月

右禮部尙書張胤碑在醴泉縣昭陵兩唐書儒學傳  
俱作張後胤新唐書後胤字嗣宗此碑前已殘泐惟  
後云故金紫光祿大夫張胤字可辨碑云第二子濟  
子謙以宰相世系表證之當云第二子濟第三子謙  
書碑者脫第三二字世系表後胤十一子碑可見者  
七人長子震左衛零池府折衝都尉第五子律師表  
云王府諮議參軍碑作泗州司馬第六子小師表云  
朱陽令碑云早夭不言官第七子統師表云金部郎  
中碑作太常丞亦可補史之闕

司徒衛景武公李靖碑 顯慶三年五月

右司徒衛景武公李靖碑在醴泉縣昭陵碑下截已殘泐靖薨後詔贈司徒使持節都督并汾箕嵐四州諸軍事并州刺史碑前題贈司徒并州都督舊唐書本傳亦云冊贈司徒并州都督當時結銜使持節都督數州者止稱其當州都督餘州可以不書

王居士塼塔銘

顯慶三年十月

右王居士磚塔銘在西安府百塔寺雍州金石記碑裂而爲七此僅得其五風吟遂潤以文義求之潤當作潤

司徒鄂國公尉遲恭碑

顯慶四年三月

右司徒鄂國公尉遲恭碑在醴泉縣昭陵碑上截已

全泐下截亦所存無幾文苑英華有此文以碑證之  
知今刊本多譌舛碑曾祖本真刊本真作貞屬想傾  
義刊本想作相浮雲寫陣刊本寫作雁導彼前茅刊  
本茅作矛譽光百辟刊本譽作舉摧堅釁銳刊本摧  
作推風駢嘯雨刊本駢作謳以影宋寫本文苑英華  
校之俱與碑同此書之所以貴善本也唯雄姿孤嶷  
影宋本孤亦作岐陋南巢之吠犬影宋本南巢亦作  
張角帝曰介諸影宋本作僉授襄郢鄧浙唐五州都  
督影宋本亦作均知其誤久矣

紀功頌

顯慶四年八月

右紀功頌在汜水縣等慈寺高宗御製御書顏師古

等慈寺碑紀平王世充此則記平竇建德也碑云近以五載巡初省方伊洛九冬狩晚講戎許鄭舊唐書高宗本紀顯慶二年正月庚寅幸洛陽十月戊戌親講武於許鄭之郊此碑立于顯慶四年八月十五日又在其後二年

蘭陵長公主碑

顯慶四年十月

右蘭陵長公主碑在醴泉縣昭陵新唐書蘭陵公主傳太宗女第十二碑作太宗第十九女傳云下嫁竇懷愁太穆皇后之族子碑作太穆皇后之孫銀青光祿大夫少府監上柱國德素之子以宰相世系表證之德素爲太穆皇后之孫懷愁爲曾孫也世系表懷

慙武威郡都督碑作慶州刺史公主傳南監本作虎  
州都督虎卽慶字之譌

### 岱岳觀題名碑

右岱岳觀題名碑在泰安縣泰山老君堂內碑記投  
龍設醮造像諸人題名自顯慶至貞元凡三十餘段  
碑本兩石束合爲一四面有字俗又稱爲鴛鴦碑新  
唐書地理志乾封縣本博城縣乾封元年更名乾封  
總章元年又曰博城神龍元年復曰乾封故碑自萬  
歲通天二年至長安四年題名皆稱博城縣景龍二  
年以後皆稱乾封縣碑側馬友鹿詩作於久視二年  
公孫杲詩作於長安元年故皆稱博城縣也



左監門將軍許洛仁碑

龍朔二年十一月

右左監門將軍許洛仁碑在醴泉縣昭陵舊唐書洛仁附在其兄許世緒傳云并州人碑云洛仁字子濟博陵安喜人又叙其祖以前云卽安樂土權居晉陽是其先世已從博陵遷并州也元和姓纂北齊武川鎮將武彪生康康生緒洛仁碑云祖彪齊儀同三司善元郡守武川鎮將襲爵寧口縣公康名與官爵已泐尚有口口都督口州刺史江夏縣開國公可辨亦視姓纂爲詳

道因法師碑

龍朔三年十月

右道因法師碑在西安府學宮碑稱道因追赴京邑

止大慈恩寺與立裝法師證釋梵本續高僧傳立裝以貞觀十九年正月二十四日返迹京師遂召沙門慧明靈明等以爲證義沙門行友立曠等以爲綴輯沙門智證辨機等以爲錄文沙門立模以證梵語沙門立應以定字譌其年五月創開翻譯道因之證釋梵本卽在此時碑前題大唐故翻經大德一切經音義立應撰銜亦題唐大慈恩寺翻經沙門當時以翻經爲榮故皆入于結銜

騎都尉李文墓誌銘

麟德元年二月

右騎都尉李文墓誌銘在大荔縣金塔寺文云鈎深索隱懍風格以繩違蹟要探機肅霜毫紉繆毫下當

脫一字闕門從訓斷織流慈說文闕闕門也國語曰  
闕門而與之言長著雪竹著卽嗟字

燕國定公于志寧碑

乾封元年十一月

右燕國定公于志寧碑在三原縣三家店舊唐書于  
志寧傳永徽元年加光祿大夫進封燕國公二年監  
修國史拜尚書左僕射同中書門下三品三年以本  
官兼太子少師金石錄云以碑攷之其初拜僕射也  
未嘗領中書門下三品長孫无忌唐律疏議序進于  
永徽四年十一月十九日于志寧結御稱尚書左僕  
射兼太子少師監修國史上柱國燕國公是亦未領  
中書門下三品與碑正同碑又云監撰新禮類文新

唐書藝文志大唐儀禮一百卷撰人有于志寧新禮  
類文當是其初名

紀國先妃陸氏碑

乾封元年十二月

右紀國先妃陸氏碑在醴泉縣昭陵太宗第十子紀  
王慎之妃也碑稱妃河南洛陽人元和姓纂河南洛  
陽陸氏出自代北爲郡長大人號步六孤氏後魏孝  
文遷洛改爲陸氏碑云祖立素益州大都督府長史  
太子口庶子父爽尙書庫部兵部二曹郎中姓纂陸  
融隋洛州刺史生立素右庶子立素生爽兵部郎中  
碑立素上稱使持節口州諸軍事洛州刺史上柱國  
定陵懷公名泐者卽融也爲妃之曾祖金石萃編以

爲陸騰者誤騰是融之祖也

敬善寺石像銘

右敬善寺石像銘在洛陽縣文云紀國太妃韋氏新  
唐書太宗諸子傳韋妃生愼太妃卽紀王愼之母銘  
文李孝倫撰結銜稱宣德郎守記室叅軍事舊唐書  
職官志親王府記室叅軍事二人從六品上掌表啓  
書疏孝倫當卽紀王府官

隋桂州總管武康郡公令狐熙碑

乾封二年五月

右隋桂州總管武康郡公令狐熙碑在耀州熙隋書  
有傳令狐德棻父也碑卽德棻所撰碑叙熙開皇十  
二年判禮部度支兵部刑部工部尙書及秘書監又

云高祖鑒觀四方求人之口高祖者唐高祖也故與下文大唐貞觀俱跳行書舊唐書高祖本紀隋受禪補千牛備身文帝獨孤皇后卽高祖從母也由是特見親愛其時與熙或有舊交惜碑泐不能考耳

左武衛大將軍李孝同碑

咸亨元年五月

右左武衛大將軍李孝同碑在三原縣三家店孝同淮安靖王神通第三子舊唐書孝同附見其父神通傳唯云武德五年封淄川王太宗卽位降爵爲公據碑太宗御極授左千牛備身拜游擊將軍授右衛交川府右果毅都尉除右衛親衛府左郎將遷中郎將高宗加寧遠將軍左千牛中郎將兼檢校左衛將軍

拜右驍衛將軍顯慶二年授使持節普州諸軍事普  
州刺史尋授播州刺史加明威將軍仍統右羽林軍  
事口壯武將軍乾封三年遷右衛將軍總章二年十  
一月口五日薨贈左武衛大將軍使持節都督代忻  
朔蔚四州諸軍事代州刺史史皆不書碑稱祖寧州  
刺史趙興郡守海州刺史鄭孝王隋書地理志北地  
郡後魏置豳州西魏改爲寧州大業初復曰豳州定  
安縣舊置趙興郡開皇初廢鄭孝王之爲寧州趙興  
郡守當在開皇前

李訓等造大道天尊像記并釋文

咸亨元年

右李訓等造大道天尊像記在絳州龍興宮卽世所

稱碧落碑也有咸通十一年鄭承規釋文摻鴻寶之靈術摻卽操字鄭誤釋爲參舉駕斯留舉卽奔字見石鼓文鄭誤釋爲歛諸家皆未及

內侍汶江縣侯張阿難碑

咸亨二年九月

右內侍汶江縣侯張阿難碑在醴泉縣北二十里馬旂寨碑稱阿難自隨歸唐從征有功爲謁者監尋轉口給事俄遷內侍汶江縣開國縣侯口口監門將軍兼檢校口口銀青光祿大夫新唐書宦者列傳序太宗詔內侍省不置三品官以內侍爲之長階第四不任以事阿難所授尙是初制也太宗稱文皇帝此碑作文帝



少林寺金剛經

咸亨三年十月

右少林寺金剛經在登封縣王知敬書結銜稱守冀  
王友舊唐書高宗本紀總章二年十一月丁亥徙封  
豫王旭輪爲冀王一名輪上元三年正月戊戌徙爲  
相王後改名旦卽睿宗也職官志親王友從第五品  
下末題大唐咸亨三年口次壬申十月戊午朔三日  
庚申高宗本紀是年十一月戊子朔碑書十月戊午  
朔亦與史合

三藏聖教序記并心經

咸亨三年十二月

右三藏聖教序記并心經在西安府學宮是弘福寺  
沙門懷仁集王羲之書褚遂良王行滿兩本唯有序

記此復有答勅及教并所譯心經于志寧等五人奉  
勅潤色銜名心經前題貞觀廿二年八月三日內出  
般若波羅蜜多心經沙門玄奘奉詔譯末說呪曰揭  
諦揭諦般羅揭諦般羅僧揭諦菩提莎婆呵當時大  
慈恩寺沙門玄應亦同奉詔翻經其所撰一切經音  
義第二十一卷有般若波羅蜜多心經揭諦作揭帝  
莎婆呵作莎呵與此本不同

中書令馬周碑

上元元年十月

右中書令馬周碑在醴泉縣昭陵貞觀六年上有下  
省修起居注六字舊唐書本傳貞觀五年太宗令百  
寮上書言得失周爲中郎將常何陳便宜令直門下

省不言脩起居注者史闕文也傳十八年遷中書令  
依舊兼太子右庶子碑作左庶子傳卒贈幽州都督  
高宗卽位追贈尚書右僕射高唐縣公碑高唐縣開  
國公則太宗時贈也碑額題故中書令舊唐書職官  
志尚書右僕射開國縣公皆從二品中書令正第三  
品舊班在左相上開元令移在下立碑時中書令尙  
在左相之上

孝敬皇帝叡德紀

上元二年八月

右孝敬皇帝叡德紀在偃師縣高宗第五子太子弘  
也則天后所生碑以上元二年八月十九日遷窆  
於景山之原太平寰宇記景山在緱氏縣東北曹子

建洛神賦云經通谷陵景山卽此

薛國貞公阿史那忠碑 上元二年十月

右薛國貞公阿史那忠碑在醴泉縣昭陵舊唐書本  
傳忠以擒頡利功拜右屯衛將軍貞觀九年遷右衛  
大將軍碑作廿年遷右武衛大將軍傳永徽初封薛  
國公碑作貞觀五年詔□□公食邑而永徽下不  
言碑又稱顯慶五年詔爲使持節長□道行軍大總  
管總章初詔公爲青海道行軍大總管尋又奉詔爲  
西域安撫大使兼行軍大總管又稱其父蘇爲元王  
傳皆不載

棲霞寺明徵君碑

上元三年四月

右棲霞寺明徵君碑在上元縣明徵君者南齊處士僧紹也隱於攝山其子仲暉捨宅爲寺高宗朝其裔孫宗儼以方伎入閣供奉高宗因親製此碑碑稱新舊翻譯一切經一藏房山石浮屠記後云開元十八年金仙長公主爲奏聖上賜大唐新舊譯經四千餘卷今釋藏有大唐沙門元應一切經音義二十五卷

周豫州刺史杜口墓誌

儀鳳二年五月

右周豫州刺史杜口墓誌在寶雞縣君諱字俱空未刻誌云遇周社之傾覆會鼎祚之流桡鹿散中原梟鳴宗社高班厚袞屬喪亂而傾淪墨綬金章偶崩離而失主則其人當卒在周亡以後誌稱公天統二季

終于私第天統是北齊年號周靜帝末嘗改元天統所未詳也

太尉英貞武公李勣碑

儀鳳二年十月

右太尉英貞武公李勣碑在醴泉縣石爲高宗御製御書舊唐書本傳詔授黎陽總管上柱國萊國公碑作黎州總管元和郡縣志大業二年省黎州皇朝武德二年重置黎州貞觀十七年黎州廢勣降唐在武德二年閏二月傳作黎陽誤也傳貞觀十八年太宗將親征高麗授遼東道行軍大總管碑作十九年

彭陽憲公令狐德棻碑

右彭陽憲公令狐德棻碑在耀州兩唐書本傳德棻

俱不言字碑云公諱德棻字季馨碑又稱太宗以業  
定功成時康歲稔迫從羣議將事升中下云其禮曰  
曰天曰以爲故事舊唐書禮儀志貞觀六年平突厥  
年穀屢登羣臣上言請封泰山十一年始議其禮太  
宗勅秘書少監顏師古諫議大夫朱子奢與四方名  
儒博物之士叅議得失是德棻亦預其議也兩唐書  
本傳俱不載

棲霞寺講堂佛鍾經碑

儀鳳四年四月

右棲霞寺講堂佛鍾經碑在魚臺縣爾雅釋獸豹文  
鼪鼠郭璞注漢武帝得此鼠孝廉郎終軍知之賜絹  
百匹漢書終軍傳無辨豹鼠事諸書皆言寶攸此碑

云敏惡終艇亦沿用郭璞之說

散騎常侍褚亮碑

右散騎常侍褚亮碑在醴泉縣西峪村亮卒于貞觀廿一年十月碑稱太宗爲之廢朝則立碑在高宗時也新唐書世系表亮祖象太子舍人舊唐書本傳祖蒙太子中舍人碑亦作蒙與舊唐書同傳云貞觀元年爲弘文館學士九年進授員外郎散騎常侍封陽翟縣男碑封陽翟縣男在貞觀元年亦可正史之誤

天后御製詩書碑

永淳二年九月

右天后御製詩書碑在登封縣少林寺詩序云從駕幸少林寺觀先妃營建之所先妃謂其母楊舊唐書



高宗本紀永淳二年正月甲午朔幸奉天宮夏四月  
己巳還東都書云暑候將闌炎序彌溽是還東都後  
始致書與寺僧也

乾陵述聖紀

文明元年八月

右乾陵述聖紀在乾州金石錄以爲武后撰中宗書  
今碑殘泐述聖紀下太后御撰四字尙可辨舊唐書  
高宗本紀羣臣上謚曰天皇大帝廟號高宗此碑稱  
高宗大帝亦省文

奉仙觀老君像碑

右奉仙觀老君像碑在濟源縣文云洛州濟源縣宗  
姓前河陽縣令李儒意等二百五十人爲高宗天皇

大帝於奉仙觀敬造老君像一座新唐書宰相世系表無洛州房蓋同姓而非之屬也未題朝散郎上騎都尉瀘水沮渠智烈書舊唐書職官志上騎都尉正第五品上

王玄宗臨終口授銘

垂拱二年四月

右王玄宗臨終口授銘在登封縣老君洞新唐書王紹宗傳兄玄宗隱嵩山號太和先生傳黃老術銘文卽紹宗撰書玄宗行第六紹宗行第七文云此時沛國桓先生道彥亦在吾兄之側岱嶽觀題名碑有壁歷元季大弘道觀主桓道彥奉勅設金籙寶齋題名

青州寧義寺經藏碑

垂拱三年

右青州寧義寺經藏碑在壽光縣碑云貞觀初太夫人遽隨風燭則通人故屯田郎中韋山甫製其碑新唐書宰相世系表韋氏逍遙公房德運子山甫屯田郎中

木峒魏夫人祠碑

垂拱四年正月

右木峒魏夫人祠碑在河內縣碑述夫人爲劇陽侯晉任城魏陽元之女年二十四適南劉幼彥幼彥爲脩武令夫人常齋于別室夜有四真人降告夫人應爲紫虛元君上真司命名山之號封南嶽夫人宋陳田夫南嶽總勝集引魏夫人內傳與此碑畧同云夫人諱華存字賢安卽晉武帝左僕射魏舒女適與太

保公掾南陽劉父字幼彥碑適南下脫陽字

美原神泉詩

垂拱四年四月

右美原神泉詩在富平縣碑正面刻美原縣尉韋元且夏日游神泉詩并序又有主簿賈言淑詩一首序云時則垂拱元夏則其游當在垂拱元年碑陰刻徐彥伯尹元凱溫翁念李鵬四人詩皆垂拱四年作

朝議大夫雷府君墓誌

永昌元年

右朝議大夫雷府君墓誌在長安縣文已漫漶僅百餘字可辨知其卒在永昌元年春秋六十有五夫人卒在總章二年十□□三□餘俱不能審碑額題大唐故朝諡大夫雷府君墓誌諡卽諡字舊唐書職官

志朝議大夫正第五品下訪碑錄作朝請非也

右虞侯副率乙速孤神慶碑

載初元年二月

右右虞侯副率乙速孤神慶碑在醴泉縣叱干村碑約三千餘字此舊拓本不可辨者止六十餘字元和姓纂乙速孤氏代人隨魏南徙河南後魏儀同乙速孤明生臺梁郡太守生貴北齊和仁公隋左庶子貴生安晟安晟生神慶碑五代祖顯後魏拜驃騎大將軍賜姓爲乙速孤氏曾祖貴齊右衛大將軍儀同三司使持節都督岐州諸軍事岐州刺史周上開府儀同三司旨附大夫隨河州諸軍事河州刺史河州總管太子右庶子和仁郡開國公祖安齊前鋒都督周

右武侯右六府驃騎將軍開府儀同三司使持節荑州諸軍事荑州刺史隨益州都督襲封和仁郡開國公父晟皇朝上開府右武侯右廿府左車騎將軍轉驃騎將軍姓纂旣誤以貴和仁郡公爲北齊所授又合安晟爲一人并不載其官爵此集古錄所以譏其闕謬也

邛州刺史狄知遜碑

載初元年正月

右邛州刺史狄知遜碑在洛陽縣碑下截殘泐文云嫡子故口書令尙書右僕射贈司空梁國文惠公碑前題邛州刺史狄公知爲狄仁傑父知遜碑也新唐書宰相世系表知遜越州刺史碑作爲越州剡縣令

未嘗爲越州刺史表孝緒三子知儉知本知遜碑云  
第五子皆可正史之誤

王寶詮等造小石橋碑

證聖元年八月

右王寶詮等造小石橋碑在滕縣碑云檢玉云亭鏘  
金岱岳二月南巡龍輿戒此舊唐書高宗本紀麟德  
三年正月戊辰朔車駕至泰山頓改麟德三年爲乾  
封元年甲午次曲阜縣幸孔子廟二月己未次亳州  
幸老君廟此碑云二月南巡當日幸孔廟後往亳州  
經此橋也

封祀壇碑

萬歲登封元年十一月

右封祀壇碑在登封縣萬羊岡舊唐書則天皇后本

紀證聖元年加尊號天冊金輪聖神皇帝新唐書本  
紀作天冊金輪大聖皇帝碑稱而冊金輪聖神聖皇  
帝足正新唐書之誤

珍州榮德縣丞梁師亮墓誌銘

禹歲通天二年三月

右珍州榮德縣丞梁師亮墓誌銘在長安縣百塔寺  
太平寰宇記西高州下云唐貞觀十七年置珍州領  
縣四夜郎縣武德二年置麗臯榮德樂源三縣皆貞  
觀十六年開山洞分夜郎之地置榮德縣尋廢故兩  
唐書地理志皆不載元和郡縣志不知貞觀十六年  
開山洞所置有榮德縣而以夜郎當三縣之數錢辛  
楣少詹又疑漆州榮懿卽榮德之譌皆非是



馮善廓造浮圖銘

萬歲通天二年四月

右馮善廓造浮圖銘在長葛縣文云況口雞鳴遠胄  
郎署遙基史記孟嘗君列傳客之居下坐者有能爲  
雞鳴而雞盡鳴非馮驩也文似誤用

平津讀碑記卷四

終